

1 PITA

Kipihac taxlee wê Pita kivuu ge

¹ A, Pita, Yesu Kîlisi nu sinale a. A kivuu kipihac tiga i loc vô xam wê Anutu nue ge vîhati vac vigwe levac Pontas di Galesia di Kapadosia di Esia di Bitinia hixôn. Ilage tibii vevac tii xam moo sea mi xam loc dô vac vigwe tige.

² Ilage Mag Anutu xovô pyap ên nêb ob vînoo xam. Om vînoo xam ên nêb xam tu i nue. Di Myakilôhông Ngibua vông xam tu xomxo ngibua ên nêb xam vô ninyam lehe vô Yesu Kîlisi kiyang di Yesu i lipac xam vô paha lec ya ici va hi.

Vizid nivîha hixôn kiyang malehe wê Anutu vông ge i loc vô levac vô xam vîhati.

Vîyin toto obêc tixuu vông vinên wê il vông ge

³ Il ob pimil Anutu wê il lig Apumtau Yesu Kîlisi Ma yuu Anutu ge lê. Ên Anutu xo vigwe pisiv ên il luu vêl, om vông il tu xomxo paha xocbê il yubac paha tii vac ge ên wê Yesu Kîlisi kidi lec maviha vac yibên. Om il xovô ên il nêbê il obêc dô madvîha luta lêc luta, di il bin buc wê Anutu obêc vena kô il ge.

⁴ Om Anutu obêc vông nôn nivîha ti vô il bêga nêbê il obêc dô madvîha hixôn i. Nôn nivîha tige pitalên obêc ma di obêc vô nipaên lêm di xôa obêc ma lêm. Nge, Anutu viac nôn nivîha tige pyap gê lag puunê mi dibin xam.

⁵ Xam vông i vin Anutu om Anutu viac xam nivîha ya xêkizêc wê i vông ge, di xam obêc la

dô mamviha hixôn i, om Anutu viac môp tige pyap wê obêc lam yêp seac timuên.

⁶ Xam xovô ên xam nêbê xam obêc la dô hixôn Anutu, om xam mi dô hixôn xêmyaa nivîha. Mêlêc gwêbaga Anutu obêc nêl ge od viyin toto ob tulec xam di vông myavinê vô xam. Lêc ob dia lêm.

⁷ Anutu ob vông viyin toto tulec xam ên nêb viyin tige i tixuu vông vinên wê xam vông ge ên xam xovô bê vông vinên wê xam vông ge vô xêkizêc lec, me? Xam xovô bêga bê gol ge xomxo mi yê nivîha. Lêc gol tiyi wê ob vô nipaên ge, om xomxo si gol vac ngwax ên nêb ob yê bê gol ob dô xêkizêc vac ngwax me ob didee sea. Di vông vinên wê xam vông ge luu gol vêl. Om viyin wê tulec xam ge ob tixuu vông vinên wê xam vông ge tiyi xocbê ngwax tixuu gol ge ên nêb vông vinên wê xam vông ge i le xêkizêc ta, di buc timuên wê Yesu Kîlisi obêc vena le seac ge od ob pimil xam di yong xam di vông xam lêm i vô levac.

⁸ Xam mamnôn o yê Yesu ilage lêm, lêc xam xêmyaa vin lec i. Di gwêbaga xam o wê i lec mamnôn lêm, lêc xam vông i vin i di xam xêmyaa vô nivîha yang ên i, luu susu kibun ga vihati vêl, om tiyiên ma wê il ob nêl vac myad pileva ge.

⁹ Di vông vinên wê xam vông ge vô nôn nivîha vô xam bêga nêbê Anutu vô xam vêl ên xam nêm nipaên.

¹⁰ Plopete vihati wê dô ilatikwê, he nêl kiyang wê Anutu vông vô he ge yêp seac. Kiyang tige nêl ên nêbê Anutu ob xo vigwe pisiv ên il di vô il

vêl ên il nêd nipaên. Kiyang tige vô nôn lec vô il, léc he plopete ilage lungên kiyang tige kehe. Om he myag di kinêg kiyang wê nêbê Anutu obêc vô il vêl ên il nêd nipaên ge kehe.

¹¹ Myakilôhô Ngibua wê Yesu Kîlisi vông ge dô vac he plopete nilô di nêl vô he bêga nêbê, “Obêc buc timuên ge xomxo ti obêc lam kilê viyin toto pyap. Nang dêc obêc la kô xêseac yuu lê levac.” Myakilôhô Ngibua vông xovôên tibêge vô he di he ngô, léc he o xovô kehe lêm, om he kinêg ên nêbê, “Xomxo tyo obêc val lec buc tina di ob val tibêna?”

¹² Léc Anutu nêl kitong vô he bêga ên nêbê, “Xam plopete, a vông kiyang tige lec xomxo tyo vô xam ên a nêb xam loc nêl kiyang tige kitong vô xomxo vihati. Léc a o vông yuac tige vô xam ên a nêb i ngidu xacxam xôn lêm. Nge, yuac tige obêc ngidu he wê obêc yubac timuên ge xôn.” Anutu nêl bêge vô he ilage, di il xovô ên il nêbê kiyang wê he nêl ge vô nôn lec vô il, di gwêbaga xomxo nêl xolac nivîha tige kehe kitong vô xam mi xam ngô. Anutu vông Myakilôhô Ngibua wê dô lag puunê ge lam kibun ga, om xomxo nêl xolac vô xam ya xêkizêc wê Myakilôhô Ngibua vông ge. Di angela êno xo ên nêb ob xovô xolac kehe.

Anutu tyuc il ên nêb il tu xomxo ngibua i tiyi xocbê ici va ge

¹³ Mêgem xam viac piyôp i yêp nivîha, di xam viac xam nivîha di vông xam piyôp yuu nilôm i loc diluhu vô vizid nivîha wê Yesu Kîlisi obêc vông vô xam vô buc timuên wê obêc vena seac vô xam ge.

14 Xam dô i tiyi xocbê Anutu nue wê vô ninya lehe vô kiyang wê i nêl ge. Ilage xam lungên Anutu, om xam timu vô môm nipaên wê xam nilôm kidu xam ên nêb xam vông ge. Om le i lêc vông môm nipaên tibêgee i tii vac lêm.

15 Anutu wê vînoo xam ge ici va xomxo ngibua. Om xam êno, xam tu xomxo ngibua di timu vô môm nivîha.

16 Ên xolac nêl bêga ên nêbê, “A xomxo ngibua, om xam êno, xam tu xomxo ngibua i tiyi xocbê aca va ge.”

17 Xam mi kîtaa vô Anutu di nêl bêga bê, “Xe Mag ông.” Di il Mag tige ob yaxên il lec il lêd lêm. Nge, ob yaxên il toto lec il nêd môm yuu yuac wê il vông ge. Om xam xona nêb di vyac xovô Anutu di timu vô môm nivîha wê i vông ge i tiyi buc vihati wê xam dô kibun ga ge.

18 Xam xovô pyap ên xam nêbê ilage xam dô vac môm wê bume vông ge. Lêc môm tige o vô nivîha vô xam lêm. Om Anutu kisuu xam di vô xam vêl ên môm nipaên tige. Lêc o kisuu xam ya susu kibun ga xocbê silva me gol wê ob vô nipaên ge lêm.

19 Nge, kisuu xam ya hi wê Kîlisi vông ge. Anutu yê Yesu hi tiyi xocbê susu levac. Ilage xomxo si bwoc sipsip nu tu daa vô Anutu. Bwoc sipsip tige ninivi nivîha di ningeac yuu nidodo ti o yêp vac hixôn lêm. Om Yesu tiyi xocbê bwoc sipsip, ên nipaên ti o yêp vô i lêm, om i tu daa vô Anutu.

20 Ilage Anutu gên o tung lag yuu kibun lêm, di i nêl pyap ên nêb Yesu i tu daa xocbê bwoc sipsip nu ti. Nang dêc timuên Anutu vông i lam

le seac ên nêb i ngidu il xôn.

²¹ Yesu lam yib ên il nêd nipaên om il vông i vin Anutu. Anutu tipi vô Yesu kidi lec maviha vac yibên di vông lê levac hixôn xêseac wê i vông ge vô i. Om xam vông i vin pyap di bin nô n niviha wê Anutu obêc vông vô xam timuên ge.

Anutu xolac vông il vô paha lec

²² Xam ngô Anutu kiyang nô n di vô ninyam lehe vô, om môp tige vông xam nilôm vô paha lec, di vông xam xêmyaa vin lec lime vông vinên vihati. Di xam o kityoo he lêm. Nge, xam xêmyaa vin lec he nô n. Xam mi vông bêge, om xam lêc vông yuac xêkizêc di vông môp xêyaa vin lec maên i loc diluhu vô lime.

²³ Xam tu xomxo paha tiyi xocbê xam yubac paha tii vac nang ge. Lêc tame o kô xam tii vac tiyi wê xam ob wib ge lêm. Nge, Anutu xolac vông xam vô paha lec, om xam obêc dô mamviha luta. Xolac tiga maviha di obêc yêp luta lêc luta.

²⁴ Ên xolac nêl bêga ên nêbê,
 “Xomxo vihati yang tiyi xocbê pikunta, di lê levac hixôn susu nivaha wê he vông ge vihati tiyi xocbê maviya. Di pikunta obêc ngigo, di maviya obêc yal la.

²⁵ Lêc kiyang wê Apumtau vông ge obêc yêp luta lêc luta.”

Kiyang tige xolac nivaha wê xomxo nêl kitong vô xam ge.

2

Apumtau tiyi xocbê ngidax wê maviha ge

¹ Om xam sea môp nipaên vihati yang, di sea kiyang kityooên, di sea môp nipaên wê xam viyum vac kiyang nivîha ge, di sea môp wê xam nim nyag vô xomxo ên susu wê he kô ge, di sea môp wê xam nêl kiyang nimi lec xomxo ge hixôn.

² Il xovô ên il nêbê il nuge nipwo mi byag tiyi buc vihati ên nêb ob lul. Om he mi lul di le lig hixôn xêkizêc di vô levac. Om xam êno byag ên lul wê nivîha ge i tiyi buc vihati. Lul ge Anutu kiyang nô. Om xam kitong Anutu kiyang i tiyi buc vihati ên i ngidu xam xôn di xam le xêkizêc mi dô nimviha, di i loc tyip lec buc wê xam obêc la dô mamviha hixôn Anutu ge.

³ Ên xam xovô ên xam nêbê xêyaa vin lecên wê Apumtau vông ge vô nivîha vô xam.

⁴ Om xam lam vô Yesu. Yesu ge tiyi xochê ngidax maviha. Lêc xomxo yê ngidax tige nipaên ên nêb tiyiên ma wê ob ngidu xumac xôn ge, om nêx i la. Lêc Anutu vînoo pyap di yê ên nêb nivîha yang.

⁵ Di xam êno ge, xam tiyi xochê ngidax wê maviha ge. Om xam tyuc lec ên Anutu i vilu vô xam di vông xam tu xumac ngîbua wê Myakîlôhî Ngîbua ob dô vac ge. Di xam ob vông yuac wê ngîbua ge di vông xam tu xochê daa vô Anutu. Xam vông bêge ên Anutu i xo yuac wê Yesu Kîlisi vông ge di yê daa wê xam vông ge i nivîha.

⁶ Xolac nêl bêga nêbê,
 “Xam ngô lê. A vînoo ngidax nivîha ti. Ngidax tige nivîha yang om tu ngidax levac wê ob le vac xumac xêkitu di hôm xumac xôn mi i le xêkizêc. Om gwêbaga a tung ngidax tige dô gê Saion. Om xomxo obêc vông i

vin i ge od he ni ob yoc lêm. Nge, a ob vông vông vinên wê he vông ge i vô nôn lec.”

⁷ Xolac nêl bêge, om xam xovô pyap ên xam nêbê Kîlisi vông nivîha vô xam wê xam vông i vin i ge. Lêc xomxo wê o vông i vin lêm ge, xolac nêl he kitong bêga ên nêbê,

“Xomxo nêx ngîdax nivîha tige la ên nêb nipaên, lêc gwêbaga ngîdax tyo tu levac mî le vac xumac xêkitu dî hôm xumac xôn mî i le pîlihi.”

⁸ Dî xolac nêl kiyang ngwe lec he wê o vông i vin lêm ge bêga ên nêbê,

“Ngîdax tige wê he obêc vînuv vîxa lec, om obêc vông he vô nipaên.”

Kiyang nêl bêge, ên he vô nîmî vô Anutu kiyang, om kiyang tige wê he obêc vînuv vîxa lec dî vông he vô nipaên ge. Ilage Anutu nêl ên nêb obêc vông bêge vô he.

⁹ Lêc xam ge, Anutu vînoo xam pyap mî xam tu xomxo wê Anutu nêb ob viac xam ge, dî xam tu xomxo wê xam ob vông yuac vô Anutu tîyi xocbê xomxo wê si daa vô Anutu ge, dî xam tu xomxo ngîbua, dî xam tu xomxo wê Anutu vông ge, dî Anutu vînoo xam ên nêb xam loc nêl yuac nivîha wê i vông ge kitong. Anutu tyuc xam om xam sea mapîtoc dî i didii xam vô xêseac nivîha wê i vông ge.

¹⁰ Ilage xam o dô tîyi xocbê Anutu nue ge lêm, lêc gwêbaga xam tu Anutu nue. Ilage Anutu o xo vîgwe pîsiv ên xam lêm, lêc gwêbaga Anutu xo vîgwe pîsiv ên xam.

Anutu nue yuac il

¹¹ Xam lige, xam dô gê kibun ga tiyi xocbê tibii vitevac wê he ob dô buc myabo tya ge. Om a nêl vô xam bê xam kol xam ên môp nipaên wê xam nilôm kidu xam ên nêb xam vông ge. Ên môp nipaên tige wê ob vông vevac vô kiyang nivîha wê yêp vac xam nilôm ge.

¹² Xam tup vô môp nivîha vac tibii madîluhu mahîgun, ên he obêc so ên nêbê xam vông môp nipaên ge od he obêc yê môp nivîha wê xam vông ge di xovô bê he nêl kiyang soên. Om he ob pimil Anutu vô buc timuên wê i obêc val vô he ge.

¹³ Xam tu Apumtau xe om xam xovô i di timu vô môp vihati wê xomxo levac toto vông ge, di loc vac he kwa ngibi. Di gavman levac ti wê tu il badzub ge, xam ngô kiyang wê i vông ge di timu vô.

¹⁴ Gavman nue yuac vihati yang ge, xam loc vac he kwa ngibi, ên gavman levac ti wê tu il badzub ge vông he lam vô il ên nêb he i vông myaviwen vô xomxo wê vông môp nipaên ge di he hi i vixa pec ên xomxo wê vông môp nivîha ge.

¹⁵ Anutu nêb xam loc vac he gavman kwa ngibi di vông môp nivîha. Ên xomxo wê piyôp maên ge he ya nêb ob nêl kiyang nipaên lec xam, lêc môp nivîha vihati wê xam vông ge ob tung he mya xôn.

¹⁶ Xam loc dô i tiyi xocbê xomxo wê Anutu piwelac he vêl ên kalabuhu ge. Lêc o piwelac xam ên nêb xam loc vông môp nipaên lêm. Nge,

piwelac xam ên nêb xam loc tu i nue yuac, om xam loc vông yuac wê i vông ge.

17 Xam vông xomxo vihati lê i vô levac di xêmyaa i vin lec xomxo vông vinên vihati yang, di xam xona ên Anutu, di vông gavman levac ti wê tu il badzub ge lê i vô levac.

Il ob timu vô Kîlisi vîxa di kilê viyin

18 Xam wê xam tu xomxo levac nue yuac di vông yuac vidaaên vô he ge, xam xona nêb di loc vac he wê viac xam ge kwa ngibi di ngô he kiyang. Om xam loc vac he wê viac xam nivîha di lum nêl kiyang vô xam ge kwa ngibi, di loc vac he wê viac xam nîpaên ge kwa ngibi hixôn.

19 Ên xam obêc vông xam yuac nivîha, lêc xomxo ob vông myavinê vô xam ge od xam xovô Anutu di le xêkizêc di kilê viyin wê he vông vô xam ge. Ên xam obêc vông bêge ge od Anutu ob yê xam nivîha.

20 Lêc xam obêc vông môt soên di xomxo hi xam lec di xam le xêkizêc di kilê viyin tige ge od xam lêm ob vô levac ên wê xam kilê viyin tige lêm. Lêc xam obêc vông môt nivîha, lêc xomxo hi xam lec di xam le xêkizêc di kilê viyin tige ge od Anutu ob yê xam ên nêb xam xomxo nivîha.

21 Anutu tyuc xam ên nêb xam le xêkizêc vac viyin, ên Kîlisi êno kilê viyin ên xam om hîlung môt tige vô xam ên nêb xam timu vô i vîxa.

22 Ên Kîlisi o vông nîpaên ti lêm di xomxo o tulec kiyang kityooên ti lec i lêm.

23 Di xomxo nêl kiyang nîpaên lec i, lêc Kîlisi o luu kiyang nîpaên ti lax vô he lêm. Di he vông myavinê levac vô i, lêc i o vông myaviwen luu

mi lax vô he lêm. Nge, vông i vin Anutu di vông ici va la vac Anutu vigê, ên xovô ên nêbê Anutu obêc yaxên xomxo vihati nêc kiyang di vông nivîha me nipaên vô he tiyi xocbê môp wê he vông ge.

²⁴ Kîlisi vaci kô il nêd nipaên lec ici va ninivi di yib lec xax pola ên nêb il sea môp nipaên vihati yang di dô madviha di timu vô môp nivîha vihati. He hi Kîlisi ninivi vô myavinê sea, lêc myavinê wê i vông ge vông xam vô nivîha lec.

²⁵ Ilage xam la vaxvax tiyi xocbê bwoc sipsip wê xomxo ti o didii he lêm ge. Lêc gwêbaga xam pilepac xam pyap di lôm lam timu vô Yesu wê didii xam di viac xam tiyi xocbê xomxo ti viac bwoc sipsip ge.

3

Kiyang lec vêx yuu vux wê iima ge

¹ A nêl pyap gwêba ên a nêbê xam loc vac xomxo levac kwa ngibi, om a ob nêl kiyang tiga vô xam vêx wê xam kô vux ge bêga bê xam loc vac liyame kiyang kwa ngibi, ên he ya obêc vông i vin Anutu kiyang lêm ge od he ob yê môp nivîha wê xam mi vông ge di ob pilepac he nilô la vô Anutu. Lêc he ob pilepac nilô ên kiyang wê xam ob nêl vô he ge lêm.

² Nge, he ob yê xam di xovô bê xam xona ên Anutu di timu vô môp nivîha, om he ob pilepac nilô la vô Anutu.

³ Lêc xam vêx ge, le i lêc vông nilôm i loc vô môp vunacên i tiyi xocbê xam vunac vô bamzub

lihi di nux komkom gol lec kwam di vinyum ngakwi paha ge lêm.

⁴ Nge, xam vunac vô xam nilôm môci bêga bê kiyang malehe i yêp vac xam nilôm. Ên vunacên tige ob vô nipaên lêm. Nge, obêc dô luta, di Anutu obêc yê vunacên tige nêb nivîha yang.

⁵ Ilage vêx wê tu vêx ngibua wê vông nilô la diluhu vô Anutu ge, he vunac vô nilô ya vunacên tibêge di ngô liyae kiyang di la vac he kwa ngibi.

⁶ Sela êno vông môp tibêge di la vac liya Eblaham vya kwa ngibi di nêl vô i ên nêbê, “A nêg levac ông.” Om xam vêx ge, xam obêc timu vô môp nivîha di xonaên obêc ma ge od xam ob tiyi xocbê Sela nue.

⁷ A ob nêl vô xam vux wê xam ii vêx ge bêga bê xam xovô vinême di dô nivîha hixôn he, ên xêkizêc wê he vông ge o tiyi wê xam vux vông ge lêm. Om xam viac he nivîha. Di xam xovô bêga bê Anutu vông vizid nivîha vô xam vux di vông vô vinême hixôn. Vizid tige bêga nêbê xam obêc dô mamvîha luta hixôn Anutu. Om xam vux, xam dô nivîha hixôn vinême ên môp nipaên ti i o lêc le vac kitaaên wê xam vông ge xôn lêm.

Il ob kilê viyin lec môp nivîha wê il vông ge

⁸ A ob nêl kiyang ti hixôn bêga bê xam nilôm i yêp tixed, di xam xo vîgwe pisiv ênma, di xam xemyaa i vin lec lime vông vinên vîhati, di xam viac lime vîhati i nivîha, di xam o yong xam vô lime lêm.

⁹ Di xam o vông nipaên vac nipaên lêm, di xomxo obêc nêl kiyang nipaên vô xam ge od le i lêc luu kiyang nipaên i loc vô he lêm. Nge,

xam kitaa vô Anutu ên i vông vizid nivihã vô he. Anutu tyuc xam ên nêb xam vông môp tibêge, om xam obêc vông bêge ge od Anutu ob vông vizid nivihã vô xam vô buc timuên.

¹⁰ Om xam timu vô môp nivihã bêgee, ên xolac nêl bêga ên nêbê,

“Xomxo ti obêc nêb dô hixôn xêyaa nivihã gê kibun ga di tulec nivihã i tiyi buc vihati ge od i vibu mya xêkizêc di kiyang nipaên ti i o lêc tyip vac mya lêm, di i viac mya nivihã di i o lêc nêl kiyang kityooên ti lêm.

¹¹ Mêd i vô nîmi vô môp nipaên vihati di timu vô môp nivihã, di myag môp wê ob dô ya kiyang malehe ge di timu vô.

¹² Ên Apumtau yê xomxo wê nivihã ge di ngidu he xôn, di ngô kitaaên wê he kitaa vô i ge. Lêc he wê vông môp nipaên ge, Apumtau vô nîmi vô he di vông myaviwen nipaên vô he.”

¹³ Xam obêc vông yuac xêkizêc di la vac môp nivihã ge od letya ob vông xam vô nipaênê?

¹⁴ Lêc xam obêc vông môp nivihã lêc xomxo obêc vông viyin vô xam ge od xam xêmyaa i vô nivihã, di le i lêc xona ên he lêm, di xam nilôm i o xo kiyang tibeac lêm.

¹⁵ Nge, xam vông nilôm i loc diluhu vô Kilisi di vông i tu xam nêm xomxo levac. Di xam viac xovôên wê xam vông ge, ên xomxo ti obêc kinêg xam lec vông vinên wê xam vông ge kehe ge od xam obêc tiyi wê xam ob nêl kitong vô he mi he xovô. Om xam wê he tiyi xochê he xomxo levac ge di lum nêl kiyang malehe vô he.

¹⁶ Di xam viac nilôm i vô paha, di nipaên ti i o yêp vô xam lêm, ên xomxo obêc nêl nipaên vô

xam ên wê xam vông i vin Kîlisi di timu vô môt nivîha ge od he ni ob yoc ên kiyang nipaên wê he nêl lec xam ge.

¹⁷ Xam obêc vông môt nivîha, lêc Anutu obêc tyuc lec ên nêbê xam tulec vîyin ge od Anutu ob yê nivîha. Ên môt tibêge luu môt wê xam tulec vîyin ên môt nipaên ge vêl.

¹⁸ Ên Kîlisi êno tulec vîyin di yib ên il nêd nipaên lu tîbed di obêc yib lu ngwe hixôn tii vac lêm. Kîlisi ge xomxo nivîha yang, lêc yib ên il wê nipaên ge ên nêb ob didii il lôm vô Anutu. Xomxo hi Yesu ninivi yib lêc i kinu dô mavîha.

¹⁹⁻²⁰ Ilage vô buc wê Nôa dô mavîha ge xomxo ya dô hixôn, lêc he o vông i vin Anutu kiyang lêm, om he yib mi la dô vac vîgwe nipaên. Om buc timuên wê Kîlisi yib ge od Kîlisi kinu la nêl xolac vô xomxo yibên tîgee kinu. Buc wê he gên dô mavîha ge od he o vông i vin Anutu kiyang lêm. Lêc Anutu o kitya he vêl lutîbed lêm. Nge, Anutu dibin he ên nêb he i pilepac nîlô loc vô i. Nôa dîlox sip levac ti, lêc he o pilepac he lêm. Om xomxo yuutyabed tiyi

xochê he vîgê vîlu di sec yon ge wê he la dô vac sip nîlô, di mia dung di lig, mêd he wê dô vac sip nîlô ge vîhati dô mavîha di ti o yib vac mia lêm.

²¹ Om môt wê Nôa dô mavîha vac sip ge tixuu il lec môt wê il lipac mia ngîbua ge bêga nêbê môt mia lipacên ge vô il vêl ên il nêd nipaên om il obêc dô madvîha. Lêc il o lipac nidnivi ên il nêb nîngeac i loc vêl lêm. Nge, mia lipacên wê il vông ge tiyi xochê il kitaa vô Anutu ên il nêb i kitya il nêd nipaên vêl di vông il nîlôd i vô paha

lec. Om wê Anutu kitya il nêd nipaên vêl ge, kehe lec wê Yesu Kîlisi kidi lec mavîha vac yibên ge.

²² Yesu lax mi la lag puunê di la dô vô Anutu vîgê hiyôv, om angela di he wê kô lê levac gê lag puunê hixôn xêkizêc toto wê dô lag puunê ge vîhati dô vac Kîlisi kwa ngibi.

4

Il sea môp nipaên wê tibii madiluhu vông ge

¹ Kîlisi kilê viyin lec ninivi om xam xovô wê i kilê viyin ge di timu vô i vîxa, ên xomxo ti obêc kô myavinê lec ninivi ge od sea môp nipaên pyap di ob timu vô i tii vac lêm.

² Mêgem buc vîhati wê obêc dô kibun ga ge, od ob la vac môp wê nilô kidu i ên nêb i vông ge lêm. Nge, ob vông môp nivîha vîhati wê Anutu xovô ên nêb i vông ge.

³ Ilage xam la vô môp nipaên toto wê tibii madiluhu xêyaa vin lec ge di xam vông môp nipaên luu vêl, om gwêbaga i tip loc. Môp nipaên wê xam vông ilage bêga nêbê môp yôdac vêx yuu vux, di môp nipaên wê xam nilôm kidu xam nêb xam vông ge, di xam num mi vô mavmav, di xam wa yaên levac di xam o vông mahigun vac lêm, di xam num mia xêkizêc di mia viac xam di xam vông môp nipaên ya, di xam vô nimim vô Anutu kiyang di yev vixam kitu vô anutu kityoên di kitaa vô he.

⁴ Ilage xam mi vông môp nipaên tibêgee, lêc gwêbaga xam sea môp nipaên la dô xel. Om tibii madiluhu yetac ên wê xam o vông môp nipaên

hixôn he lêm ge, om he nilô vô nipaên vô xam di he nêl kiyang nipaên lec xam.

⁵ Lêc obêc buc timuên ge od he obêc la le vô Anutu manôn di nêl môm nipaên wê he mi vông ge kehe kitong vô i di Anutu ob yaxên he. Anutu viac i pyap ên nêb obêc yaxên xomxo vihati yang nêb kiyang, he wê dô maviha hixôn he wê yib ge.

⁶ Vô buc wê he dô maviha ge Anutu yaxên he di he yib tiyi xocbê xomxo vihati ob yib ge. He yib pyap dêc Anutu kiyang nivaha la vô he ên nêb he i ngô di he kinu i lêc dô maviha i tiyi xocbê Anutu dô maviha ge.

Xovôên toto wê Anutu vông vô il ge

⁷ Buc wê susu vihati yang obêc tiyôô ge vô kwabo lec. Om xam viac xam di xovô nivaha di kitaa vô Anutu i tiyi buc vihati.

⁸ Môm xêyaa vin lecên tibed wê luu môm vihati yang ge vêl. Om xam xêmyaa i vin lec lime vihati, ên môm xêyaa vin lecên tiyi wê ob pilepac nipaên wê xomxo vông vô il ge vêl.

⁹ Xam lime vông vinên ya obêc miloc vô xam ge od xam vev ngwax vô he di viac he nivaha di le i lêc vông hixôn nilôm yuu lêm.

¹⁰ Anutu vông xovôên toto vô xam ên nêb xam toto vông yuac ya. Om xam vông yuac i nivaha ên i ngidu xam lime xôn. Xam obêc vông bêge ge od xam ob vông xovôên toto wê Anutu vông vô xam ge vô nôn lec.

¹¹ Om Anutu obêc vông xovôên vô xomxo ti ên nêb i nêl kiyang ge od xomxo tige i nêl Anutu kiyang. Di Anutu obêc vông xovôên vô xomxo ti ên nêb i ngidu xomxo xôn ge od xomxo tige

i ngidu xomxo xôn ya xêkizêc wê Anutu vông vô i ge. Xam obêc vông Anutu yuac toto bêge ge od xomxo ob yê yuac wê xam vông ge nivîha di pîmîl Anutu lec Yesu Kîlisi lê. Xêkizêc hixôn xêseac i yêp vô i luta lêc luta. Nôn.

Il ob kilê viyin lec Kîlisi lê

¹² Xam lige wê a xêgyaa vin lec xam ge, gwêbaga viyin yuu myavinê levac, tiyi xochê ngwax myavinê nux xam ge, tulec xam ên nêb ob tixuu xam. Om le i lêc yetac ên viyin tige lêm, di le i lêc xo di nêl bêga bê viyin tige paha ti lêm.

¹³ Nge, xam kilê viyin tiyi xochê Kîlisi kilê ge, om xam xêmyaa i nivîha. Ên buc timuên wê Kîlisi hixôn xêseac wê i vông ge obêc lam le seac ge od xam xêmyaa ob vô nivîha yang.

¹⁴ Om xomxo obêc nêl nîpaên lec xam ên wê xam vông i vin Kîlisi ge od xam xêmyaa i nivîha, ên Anutu Myakilôhông Ngîbua hixôn xêseac wê i vông ge dô hixôn xam pyap.

¹⁵ Lêc xam obêc kô myavinê ge od le i lêc kô lec wê xam hi xomxo ti yib ge lêm, me xam vun xomxo susu ge lêm, me xam vông môp nîpaên viyang viyang ge lêm, me xam tung mamnông loc vô xomxo susu ya hixôn lêm. Nge, xam obêc kô myavinê ge od xam kô lec wê xam vông i vin Yesu ge.

¹⁶ Om xomxo ti obêc vông viyin vô xam ên wê xam vông i vin Kîlisi ge od xam nim i o yoc lêm. Nge, xam pîmîl Anutu lec Kîlisi lê.

¹⁷ Ên buc wê Anutu ob yaxên xomxo vihati nên kiyang ge vô kwabo lec. Di obêc yaxên il wê il

tu i nue ge taxlee. Om Anutu obêc yaxên il wê il vông i vin i kiyang ge taxlee ge od ob vô bêna vô he wê pwoo i kiyang vac ge?

¹⁸ Xolac nêl bêga ên nêbê,

“Xomxo vông vinên ob tulec viyin levac, di obêc timuên ge he ob la dô maviha. Di he wê pwoo Anutu kiyang vac di vông môp nipaên ge, he obêc la na?”

¹⁹ Xolac nêl bêge, mêgem Anutu obêc tyuc lec ên nêb viyin ti i tulec xam ge od xam vông môp nivîha di vông nilôm yuu nimnivi i loc vô Anutu. Ên Anutu tung il lec kibun ga di viac il nivîha, di obêc sea kiyang wê hilu vô il ge lêm.

5

Xam gyovixa xam viac Anutu nue sipsip

¹ A nêb a ob nêl kiyang ti vô he gyovixa vac xam mahîgun. A êno gyovixa ti, di a xê Kilisi lec magnôn di xê wê i kilê viyin ge. Di obêc buc timuên ge xêseac wê Anutu vông ge obêc lam seac, mêd a hixôn xam, il xôn obêc la dô vac xêseac tige. Om a ob nêl xêkizêc vô xam gyovixa bêga bê

² xam viac Anutu nue i nivîha ên he tiyi xocbê bwoc sipsip wê xam ob viac ge. Lêc

xam nim obêc ma, lêc xomxo ti kidu xam vac yuac tige ge od o nivîha lêm. Om xam xêmyaa i vin lec yuac gyovixa tige di xam vông yuac tyo i tiyi xocbê Anutu vông vô xam ge. Di le i lêc xo bê xam ob vông yuac gyovixa ên kô mone lec lêm. Nge, xam nilôm i kidu xam, di xam vông yuac tige.

³ Di xam o léc wê xacxam va tiyi xocbê xomxo levac di wê lime wê Anutu vông vac xam vigêm ge nipaên di vông vîyin vô he lêm. Nge, xam viac he nivîha di didii he vac môp nivîha ên he i yê di timu vô xam vixam.

⁴ Xam wê gyovîxa ge, xam obêc vông yuac bêge ge od buc timuên wê Yesu Kîlisi obêc vena ge od xam obêc kô xêseac wê vixôlên obêc ma ge. Yesu Kîlisi ge il bazub wê viac il ge.

Il ob pilepac il di vô nipwo lec

⁵ A ob nêl vô xam ngîvihi bêga bê xam loc vac gyovîxa kwa ngîbi di ngô he vya. Di a ob nêl vô xam vêx yuu vux vîhati bêga bê le i léc kô xam lec vô xomxo lêm. Nge, xam pilepac xam mi vô nipwo lec di loc vac lime vông vinên vîhati kwa ngîbi, ên kiyang yêp bêga ên nêbê, “Anutu obêc vông vevac vô he wê kô he lec vô xomxo ge, di obêc vông vizid nivîha vô he wê pilepac he mi vô nipwo lec ge.”

⁶ Kiyang nêl bêge, mêgem xam pilepac xam di vô nipwo lec di loc vac Anutu xêkizêc kwa ngîbi, êdêc vô buc timuên wê Anutu vaci vino ge od i hêm xam lec di vông xam lêm i vô levac.

⁷ Anutu xo xam di viac xam, om xam vông vîyin vîhati wê tulec xam ge i loc vac i vigê.

⁸ Xam piyôp i yêp nivîha di xam viac xam, ên Seten wê vông vevac vô xam ge la di lôm di la di lôm di myag xomxo ên nêb ob hi i tiyi xocbê noo laion vô vya levac ên nêb ob nga xomxo ge.

⁹ Om xam le xêkizêc ya vông vinên wê xam vông ge di vông vevac vô Seten, ên xam xovô pyap ên xam nêbê lime vông vinên vac vigwe

vihati yang tulec viyin yuu myavinê tiyi xocbê xam tulec ge.

¹⁰ Anutu ge vizid nivuha vihati yang kehe i, di tyuc il ên nêbê il obêc la dô vac xêseac wê i vông ge luta lêc luta lec yuac wê Kîlisi vông ge. Om gwêbaga xam ob kilê viyin vac buc myabo tya. Lêc viyin obêc tiyôô, di Anutu vaci obêc vông xam vô nivuha lec i tii vac nang, di ngîdu vông vinên wê xam vông ge xôn, di vông xam le xêkizêc.

¹¹ Xêkizêc wê Anutu vông ge ob yêp luta lêc luta. Nôn.

Pita kiyang timuên

¹² A, Pita, a nêl kiyang bo wê yêp vac kipihac tiga di Sailas kivuu ya vigê. A xê Sailas tiyi xocbê a lig nivuha wê vông yuac nivuha ge. A kivuu kipihac tiga loc vô xam ên a nêb a ob ngîdu xam xôn di nêl xêyaa vin lecên wê Anutu vông ge kitong vô xam bêga bê xêyaa vin lecên wê Anutu vông ge vixôhilôg nôn. Om xam le xêkizêc ya kiyang nôn tige.

¹³ Xomxo vông vinên Babilon wê Anutu vinoo he pyap ge, he nêl vidiiên vô xam. Di a nug Mak êno nêl vidiiên vô xam.

¹⁴ Xam vihati pul lime vông vinên vigê ên i nêl kitong vô he bê xam xêmyaa vin lec he.

Kiyang malehe i loc ngîdu xam wê xam tu Kîlisi xe ge xôn.

Yesu Xolac
The New Testament in the Patep Language of Papua
New Guinea
Nupela Testamen long tokples Patep long Niugini
copyright © 1986 Wycliffe Bible Translators, Inc.

Language: Patep

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-14

PDF generated using Haiola and XeLaTeX on 18 Apr 2025 from source files dated 31 Aug 2023

3d2c844d-4bc8-590b-bbf2-3a5fcd1f7ad8